

三水縣志卷之十六

雜錄

雜錄者雜仙踪梵跡吉兆休徵而錄之者也在昔  
孝武立仙觀以祈年孝明得沙門于西竺其教寢  
廣其徒亦寢眾棟宇雲連緇黃宅之至今不廢至  
若齊諧志怪山海傳經雖未協乎經而合乎道然  
據所薈萃時與正史頗相發明六合之內何所不  
有今錄其詭而不失夫正者附志乘之末庶無貽  
譏于博物君子也志雜錄

寺觀

三水縣志

卷之十六

雜錄

一

華山寺

宋嘉定間僧復菴建元至正僧古溪重修  
傳燈者為僧慧侃里人李宜慰文進捐貲  
建圓通閣復於法堂後建六祖南宗堂買田數  
百畝為贍寺中有金沙井開龍鍾寺朽壞康熙  
四十八年縣令鄭致與同城文武官捐俸并勸  
民出資同修

紫竹庵

在城東門內舊是邑人黃際會書館城守  
熊文舉修立為庵

青雲庵

在河旁塔下

和光寺

在西南街後內有葫蘆井邑人李鍾穎修  
復作記

笑天巖

在城東十五里山上巖石有龍涎水滴石  
玲瓏康熙二十四年邑令王永名創殿塑

佛住僧一汝

花果寺

寺設於宋末岡頭鄉梁姓人建捐有寺田  
利瓊長岐都人士設有文會歲首齊赴課  
文後學進庠及中式例置酒捐資貯為文會供  
課之用

堯福庵 在堯山之麓

紫霞庵 城北三里有茂松修竹之勝

慶蓮庵 在西南沙頭

竹林古寺 在竹洲村之右社學峙其南高廟枕其北有修竹茂林清流映帶頗稱名勝明

初鄉人捐資所建代延僧人供奉佛像為是鄉福地

寶蓮寺 在蔡坑依山近水綠竹蒼松頗有勝槩

文峯庵 在西南文秀山青山環抱曲徑通幽

樹庵 在西南東溪社學後為鼎湖下院有碑

寶樹庵 在九水岡鄉之東

神異

三水縣志 卷之十六 寺觀

葛仙 卽葛庚變姓名為白玉蟾嘗與弟子彭耜張

湛然鄭儒往來堯山又傳嘗至雲谷泉煉丹洗藥故其泉因號葛仙泉至今其水清冽秋冬不竭

李仙 不知何許人亦不傳其名龍坡山有巨石寬

平方整上有足掌印世傳李仙煉丹雞藤圃功成行滿于此飛昇因畱跡焉

六祖 卽盧惠能相傳嘗持修華嚴古寺亦嘗在西

僧復庵 宋嘉定初由衡湘浮杯駐錫龍坡山三界

元通四大和合度緣餘鉢則以濟貧時或倒駕慈航離衆生苦海居民以是皈依為之募財開山是為華胥古梵

僧古溪 元至正間在華山寺法界清修慧性凝定

自出家至湏盤足跡未嘗一履俗地與遠公送客不過虎溪其高致相類也

僧永纓 南海人住華山寺年八十餘茶毘之夕為嘉靖壬戌生平淡素不雜色相以故內養

凝固一日召僧徒薰沐更衣跌坐而化

### 忠烈顯神

即胥江成偉詳見武略本傳

### 沙刀異力

傳元時樂塘有胡姓者力舉千鈞善舞沙刀出入常持以自衛後徵為扈駕將

軍故稱為胡沙刀云

### 白沙前知

清塘陸之從遊白沙先生門下一日早見之曰汝有喜色對曰家報某婦昨舉

一子先生欣然援筆命曰陽和字藹然連命五名曰陽開陽升陽泰陽生陽開以次各字之獨陽生不字後之果舉五子四子成立陽生甫冠早逝蓋先生精河洛數學前知類此但不常語耳詳見陳子言行錄

### 五常孝感

史五常內黃人父萱洪武間任廣東按察司僉事卒于官五常始七歲母以子幼且無資不能歸葬遂權厝西南和光寺側遂攜五常北還每諭之曰汝父棺中有大錢可驗

## 三水縣志

### 卷之十六

神異

三

待汝長成時尋骨歸葬則汝可報父恩而我亦盡婦道矣後母沒五常年五十乃來殯所求焉既至弗獲旦夕泣告于天路人憐之遺以飲食數日憲幕張珪知之為白于臺馳簡巡司李斌多方物色果得所殯遺骸大錢猶在五常以禮斂觀當道重其孝給以舟車路費贈以詩文既還葬結廬墓側居三年正統間有司列狀上聞詔旌表其門賜以穀帛

### 颶風止寇

按南海廟志宋儂智高之叛欲襲廣州次于三水颶風大作數日智高弗克追

以故廣州守臣得為之備謂為海臣効靈云

### 妖鐘鬪龍

華山地藏菴有鐘一宋宣和七年造進鉗作蛟龍擎據狀四週則鳥獸虫魚雲

藻之形制極工巧篆亦古拙俗傳其鐘每夜與烏石潭蛟相關鬪蛋戶暨濱水居民常聞潭底有聲時無風或浪花噴白心常異之而莫知所以然也忽寺僧古溪晨起念經覺鐘不在樑忽輕聲隱隱自空而來初遠漸近瞬息復懸如故淋漓水濕腥氣逼人嗣後陰夜或風雨必失所在

古溪懼率僧衆俟其至破之其怪遂絕今廢于地藏菴中

陳半仙

白坭明萬厯時人得異術能闢邪治妖取效異常其術法如空中落飛鳥彼手持剪而他人頭髮及禽羽能令自斷書紙符念咒符卽自飛粘牆壁紙船送殃劔一揮而船自遠飛去能取人物輒還之以爲戲及身死其子爲道士法術不傳

按西京賦云小說九百起白虞初嗣而中壘說苑臨川世說至有明以來雜紀叢談志林粵觚蠻司合志考其紀載雖不無夸誕要皆有可取也昔司馬遷之傳燕太子丹也本燕太子丹三篇而削去烏頭白馬生角二語論者以爲抉擇甚精南方尙鬼粵之風俗多怪誕不經之事今

三水縣志

卷之十六

神異

四

僅載其寺觀而事之頗涉神異者間錄其一二焉亦足以廣見聞而資懲勸也

跋

今天子勵精圖治遐陬絕域悉入版圖與大小  
臣工所以考職方而重掌故者詳且備矣  
歲戊寅

制府阮芸臺大人

奏准纂修廣東通志而徵志於郡縣猗歟休  
哉典甚盛也署邑侯李公奉檄以舊志殘

新跋

五

缺屬

攀

與鄧君雲龍陸君鳳喈董君思誠

圖之念雕蟲小技挾蠻牋一幅安敢修五  
鳳層樓而辱承雅意不敢不黽勉從事適  
李侯受替盱山汪侯以進士來蒞勤民  
造士解懸噓槁更復畱心圖籍慨然曰余  
聞之志者制之存也政之經也凡以責之  
職守也況前令李君已爲疇矢曷可緩焉

大抵天下事行之則爲實政置之則爲貌  
言志不志在力行如何耳溯我邑自前明  
嘉靖癸亥陶侯始成縣志其後高侯有崇  
正戊寅志

國朝蘇侯有康熙癸丑志鄭侯有康熙庚寅  
志邱聚不修百有十年矣竊謂作志難修  
志更難左氏公穀同時撰述載事釋經人

新跋

六

異其名地異其處馬班而下陳承祚稱良  
史乃以十斛米不立丁敬禮傳于志寧避  
嫌而佚王通張說大手筆不能無愧碑銘  
是作之難也至於生千百年後耳目既有  
所域而欲考証得失辨別舛謬談何容易  
況古人之書有不可一律論者如本草題  
以神農悉編漢時郡國不得擯以爲僞山

海經夏王所紀而援引間及殷朝不能信以爲真是在考古者之反覆審論也抑或守殘護缺不克微顯闡幽則齊婦含冤三年不雨忠臣血碧千古爲憐名節湮沒安所得馨香俎豆乎又或因循附會根據未精卽類爾雅螭虺坊州杜若不免齒冷蕪林則洵乎修之者難也今汪侯之續修

此志也考覈精微洵足附著作之林而補前志所未備攀等何幸涉筆其間也而不作聰明不牽浮議不怵貴勢不棄幽遐區區之心亦庶幾無負疚於名教矣是志也八閏月而告竣質成於侯壽諸梨棗卷凡十六紀分野則識牽牛婺女之躔度也載地輿則識南海高要所分割也於山而

見崑都之高也於水而見肄江之大也論  
所產之人物若梁御史軫何尙書維栢李  
御史希孔其剛方正直皆無異埋輪折柱  
也若胡御史澧梁府尹鶴鳴陳副使開泰  
其德業治行皆不減漢代龔黃也李中丞  
義壯則父子科名林部郎鍾則祖孫文學  
張省元謙光則著書立說陸學博宣則好

新跋

八

古力行皆足以超前而軼後也至於官聯  
之得失風俗之媿惡與夫禮樂政刑之統  
紀德行道藝之分著亦莫不瞭如指掌若  
此者匪直備一邑之典故於以彙諸通志  
上之石渠天祿珥筆之臣悉以獻之  
當寧是敷奏之遺也豈不盛哉豈不盛哉

皆



嘉慶二十四年歲次己卯秋七月邑舉人  
陳攀桂謹跋

新跋

九

前修邑志姓氏

明嘉靖四十二年癸亥始修邑志

主修

廣州府三水縣知縣陶守訓 廣西舉人

協修

廣州府三水縣儒學訓導董大恩 福建歲貢

廣州府三水縣儒學訓導周郡 廣西歲貢

崇正十一年戊寅重修邑志

主修

廣州府三水縣知縣高其昌 浙江舉人

三水縣志

卷之十六

前修志姓氏

十

校正

廣州府三水縣儒學教諭鄭廷樾 澄海舉人

協修

萬曆庚子科舉人原任石埭縣知縣李士安 邑人

崇正庚午科舉人原任永福縣知縣李鍾穎 邑人

天啟丁卯科舉人馮顯忠 邑人

崇正癸卯科舉人梁挺桂 邑人

校閱

生員陳羔梁嗣楨吳京歐陽大業陸象陸嘉士 邑人

國朝康熙十二年癸丑重修邑志

主修

廣州府三水縣知縣蘇 喟 河南進士

校正

廣州府三水縣儒學訓導陳大觀 雷州人 歲貢

協修

順治丁酉科副貢原任蒼梧縣教諭梁紹光 邑人

校閱

生員 錢懋孝 邑人

嚴之炎 邑人

康熙四十九年庚寅重修邑志

三水縣志

卷之十六

前修志姓氏

士

主修

廣州府三水縣知縣鄭 玟 福建舉人

校正

廣州府三水縣儒學教諭謝式南 海陽人 歲貢

廣州府三水縣儒學訓導李文煒 澄海人 歲貢

協修

康熙戊子科舉人董振鷺 邑人

康熙戊子科舉人李應秋 邑人

校閱

生員

杜聿修董國幹 邑人

聞之志猶史也我明興置史官若與右史差異而監修纂錄其於國事亦云備矣復命儒臣輯爲一統志者意在與史更相出入以無遺天下之事志亦鉅典也哉乃各省有通志各郡邑又自爲志何煩簡之不同若是蓋一統志主於要通志主于詳郡邑志復加詳愈要則愈約愈詳則愈博理勢然也吾邑建自世廟五年至四十二年陶侯始修邑志時僅存其大略以俟君子屆今邑侯高公刑簡政清乘其治事之餘與學師鄭公議及邑志申請

旣允具幣徵鄉紳明府李公暨穎與同袍梁君以及文學六君子旣而同袍馮君繼志皆得與於斯焉於時瞿然自訝窮鄉所有如入五都市知萬不相當也迨惟高侯力擅三長鄭師學匹董范遂舉百年曠典區分無間猗歟盛矣溫公有言李延壽近世之佳史也但恨不作志使數代制度沿革皆沒不見今有高侯之與鄭師三水制度其不沒矣斯志也穎雖以鄙陋而佐末議而旁稽竊訂夫亦豈有自外於諸君子者哉志成與有榮焉高侯命穎一言他未敢贅謹以此跋

己卯三春邑志刻告竣幼荼鄭子以高侯之命謂茲役也桂旣操觚從諸君子後卽不可無後序桂再謝不敏而鄭子固命之桂曰然以桂年最晚耳目寡陋無所前承幸從諸君子日左右觀草創討論以抵於修飾而潤色之大成卽何但三水有佳誌乎蓋桂之鄙劣所願學者則亦於是日進矣不合狐衆不成一裘之美也不有東里不生衆美之光也不虛心博稽徵核不能定古今雜正之籍也乃於是再取新志自甲而下畢細讀之三水數十

三水縣志

卷之十六

舊跋

三

里百年來利病因揀之間厯厯數卷內爲之吁者三嘆而仰者一喜躍而低徊者至再吁者云何三水水國也二江之潦皆受焉水爲土患則稼難爲功然一旱則二江之上游其產穀資我者又患曠乾也且而西鄰清遠四會者山寇頻逸餘瀕江者又水賊時猖焉皆已事矣先輩憂之矣其何以善之也衝土旣瘠而復勤官疲於迎送之絡繹且或不逮曾幾何時得以按典適侯而詳敷之以撫綏此勞止之民者又况於寇盜待剪而盤錯實甚乎是所以嘆也雖然迎送卽衝也諸憲節及皇華貴

使凡有力能振下邑者無不巡歷於是矣其庶幾  
問其風憫其勞而思所以恤之乎夫山谷僻壤有  
數十年而不獲大人之一臨者矣雖有情狀孰與  
見之今也有過而與憫者進志而陳覽焉三水之  
民其當有瘳也而竊爲之躍然有喜低徊至再者  
何邑雖疲亦不號難治遺俗淳如也鄉先哲奮起  
多流風往者學校未嘗廢闕今聖主廣厲維新兼  
篤行小學而又得豈弟作人之父母日與賢師欵  
欵勤課督之美哉優優乎語不云乎君子學道則  
愛人小人學道則易使也此言雖尋常所忻慕云

所忻慕云古之人有行之于今爲烈而卹也其貧  
也邑則固貧土也學於社者盡貴糴之子弟學於  
庠者類皆館穀之先生也瘠則思善大任降則天  
或有所先苦之以告吾邑里富而爲教非絜矩之  
君子曷望哉蓋桂於是終讀茲志而不覺言之贅  
也慎茲志也以往其於邑之利病因採也庶有所  
稽矣若夫主修者之資餼維繁折衷盡善也總修  
者之心勞才富共濟以定識也諸君子之各備衆  
美以爲良也則桂年最晚無所短長不過構梨觀  
厥盛云爾

舊志跋

梁紹光

一統全志合天下郡縣之志以成則天下者

天子之天下亦四方星布碁置分郡縣以治之而玉帛

車書以會歸乎

天子一統之天下者也我

皇上承

累世之洪基禮樂文章蔚然丕變加以

宵旰臨軒舉凡國計民依罔弗損益之以要歸乎至當

撫茲八荒我闔已治已安爰

諭天下修全志以譜十五省之全俾大而山川形勝顯

三水縣志

卷之十六

舊跋

五

而忠孝廉節微而物力土情咸一覽而瞭若指掌  
焉則有山川而予以防衛因氣候而予以節宣列  
人才而加之勸勉卽物力以審厥源流覽土情以  
宜其神化皆將於志而得之非僅藉是以楊扞盛  
治已也本邑雖地僅彈丸亦得由郡而上之以同  
彰一代之盛第遡自明嘉靖五年丙戌立縣以來  
越三十有六年壬戌以陶令之纂修而志成又逾  
七十有餘年丁丑以高令之纂修而志再成於今  
時之相去未幾而昔之鑄諸梨棗者欲求一殘篇  
斷簡而不可復得矣則於時之與志而俱蹂躪於

金戈鐵馬中者又豈獨一志已哉以是思肄肄民之困可知也昔霍文敏論立三水謂十年之後民必不堪命蓋以邑小而路衝民貧而土瘠地理所產五穀而外未嘗別有所謂山川原隰之利也民俗所習耕穫而外未嘗別有所謂賀遷貨居之積也一遇兵凶洊至絡繹頻仍公私其交困矣無惑乎民日凋疲賦日積逋各典類皆廢缺也雖民之奉公惟力是視俗亦頗稱易治而地際衝要幾務繁難自立縣後由進士出宰邑治前惟西粵陳公治不越年卽改調番邑

三水縣志

卷之十六

舊蹟

十六

國朝以來則自今 汲郡蘇侯始侯己酉秋下車目擊瘡痍爲之集哀鴻清糧冊舉前之任斯土者皆以先報貯後奉

詔赦官以民欠累民以積逋累後先一轍侯悉力爲詳請開銷俾

恩不阻乎中格民不嘆夫屯膏茲者中澤之鴻旣歸萑苻之警亦息民安於野士習於庠遞及行臺營汛城廟倉房諸營繕各皆井井有條爰思經畫旣定而文獻不彰奚以建規模而垂久遠每於歲時月吉與光等談軼事爲之唏噓者久之曰古稱域中



有三大史居其一邑之有志亦猶國之有史也其  
可缺乎忽承

綸音下降普天下諭令同修侯以三長四足之兼備猶  
遜謝至再擇吉開局延集光等互爲參酌損益本  
乎前志倣之別籍爲之先正其大綱次詳其條目  
凡例共一十有五而首冠以輿圖曰縣之所由建  
也次事紀曰縣建而事以起也次秩官曰事以官  
守而允釐也次選舉曰爲政莫先於籲俊也次地  
理曰選士必於鄉也有地理然後有建置故次之  
以建置建置需乎賦役故次之以賦役有賦役然

後有禮制故次之以禮制有禮制然後有學校故  
次之以學校有文事者必有武備故次之以兵防  
兵以防患水以興利故次之以水利凡皆總理於  
秩官倘董率有方斯秩官其可傳矣故次之以秩  
官傳官爲邑之表能正躬率物則邑之人物下及  
列女又皆德立而行彰矣故次之以人物傳列女  
傳推而外志所載咸歸化宇非故外而遠之將以  
合外而內之也而終以藝文者古先王祭川或委  
或源皆歸於海藝文固學海所自出也易曰觀乎  
人文以化成天下其統歸諸此總之訛者訂之缺

者補之事必取乎詳悉言不尙夫鋪張將藉是以告成可乎抑光猶有說焉邑志成而一邑之全亦且瞭若指掌矣問所謂山川之宜防衛者邑豈乏乎氣候之宜節宣者邑不猶然乎人材之需勸勉下及物力之樽節愛養土俗之窮變通人邑志不皆具備乎則卽一邑而仰體

天子纂修全志之意以治之者光從編輯中日擊蘇侯之筆則筆削則削幸等於游夏之不能贊一詞而樂見蘇侯綏猷切要之意具見於刪述論斷中矣豈曰小補之哉時癸丑花朝邑人梁紹光用本

三水縣志

卷之十六

舊跋

六

是意以爲跋

舊志跋

周夢龍

夫邑之有志何爲而作也

國家命官飭紀以布化方州而世之賢士大夫膺

簡命而蒞其地覽厥風土人民戶口賦役禮制章程莫

不備載於志於是考其文而施其事因其俗而爲

其理以調劑於剛柔燥濕之宜節宣於雨暘寒燠

之序分至啓閉雲物以書畢雨箕風民情必驗某

事爲民所利賴者圖之度之某事爲民所疾苦者

剔之汰之故文不空傳而政有實效此志之所由

貴於作也三水志書自陶侯始嗣是而編輯者代其有人茲邑侯王公奉上檄取邑志因復展修延龍與陳君黃君嚴君分任厥事龍竊惟三水僻壤其習俗無他謬巧民勞思善樸淳易化大抵然也然而土瘠民貧地當孔道皇華憲節之駐臨日新而月盛送往迎來芻蕘易竭兵燹之後瘡痍未起非藉有宜民之主扶持而安全之肆民其曷有瘳乎惟侯綏懷周悉區分營度邑有大役大務民苦不堪命者侯毅然以身仔肩之不予民以伊感也侯其能飭治行而光簡冊矣是役也侯秉鈞衡龍

三水縣志

卷之十六

舊跋

九

等操觚從事其蘇侯原版一字不更惟新編續志略爲修補然必公之輿論據事直書不敢爲浮溢之詞以滋愆戾孔子曰如有所譽者其有所試矣不其然乎不其然乎乃若見聞之未周紀載之未備文采之弗彰則龍等自慙瞶瞶安能辦此了了所期摛藻颺華出入風雅於以表章文獻敷張盛典者端有俟於後之君子矣時乙丑邑人周夢龍跋

舊志跋

謝式南

明府鄭

諱

政續修邑誌旣成向余問日子亦知稽

古爲致治之要居今乃官守之資乎易綜三墳之  
微言筦三爲道書列百王之奧義總百成篇詩關  
美化移風合貞淫咸備禮取諧民致物兼經曲始  
完春秋而下則代有專家蓋兩間之理詳於經而  
一邑之事具於誌誌可不修哉南閩是說不覺恍  
然旣退思曰夫吏治之不古也久矣非吏治之不  
古也吏治而不明天時地利兵農禮樂刑政之不  
古也其下焉者不足論卽才智之士得百里而治  
亦止逐逐於簿書錢穀以求稱厥職能以殘篇斷  
簡畱心者蓋寡矧肆當兩廣之衝皇華載道官斯

士者日奔走於迎送之不暇又何暇取舊誌之从  
稊數十年之未錄者以叅互考證如是而欲知古  
今因革人物得失以及賦役風土之殊建置選舉  
之異其道無由明府審此念夫邑誌雖修之於前  
而不續之於後則無以繼往而昭來乃體 上憲  
彙纂之至意竭力諮訪較其孰爲利孰爲害誰宜  
損誰宜益條分縷析彰昔人之美盛啓後人之典  
型巨細輕重畢舉惟求有關於吏治民生而後快  
是誌也觀之而悟天人之理則誌通於易觀之而  
知政事之道則誌通於書且觀之而陶情淑性循

規中矩明治亂之故識善惡之歸則誌又通於春秋詩禮誌可不修哉南才淺力微董正鮮術第嘆是誌之有功於世而又深服明府能於公退之餘居今稽古不倦因謬爲跋以記之

影存三水縣志後序

一代之沿革必有一代之時勢以趨之一邑之沿革必有一邑之政俗以緯之天道數十年一變疆域山川道理建置數十年亦一變惟人心風俗與鄉土人物相維持恆數百年而不變雖時有背鄉井馳域外思以趨新風氣輸引而移易之而葉墮歸根水流返壑率不能以故棄其鄉吾邑建自前明割南海高要數十里畫區而治其民愿其俗醕其力農其業織其男女勤而儉者儒碩學名臣循吏孝義節烈之行志不絕書大官大邑身之所庇蓋猶有先王之遺風焉夫運不極不終數不剝不復國變而後東南民力竭矣三水勢居上游兵車輻輳皆形勝所必爭原野蕭

三水縣志後序

條人民遷徙泥塗墜於軒冕禮義藐若弁髦識微之士思返末俗振儒風慨然有鄉先達之想誠慮陵谷既遷文獻遽絕後生小子即欲諮耆舊訪遺聞考疆理物土之宜搜文藝金石之略渺乎不可得士夫之責又惡能已舊志始於嘉靖脩於崇禎至清而康熙而嘉慶中歷四朝屢經纂輯缺而未補於今百有餘年矣耆考老大夫搢紳先生奔走相告咸以吾邑文化之盛極於同光朝廷政局之變終於宣統其中書院之建設公儲之蓄積風俗政教之留貽科舉人物之興廢在在與文化相關繫失今不載滄桑再閱杞宋何徵第茲事體大經費未集採訪為難起例發凡後賢有待乃相與搜求舊本顧十無一二叢殘守抱竟

落落如晨星夫前事之不忘後事之師名氏不傳誰彰舊德畎畝雖服孰問先疇遺本僅存影留自易字不煩於校對圖有藉於鈎稽梁君致祥致廣昆仲更創為大事表記補錄成篇用諗來者昔章實齋著文史通義謂郡邑志乘隔三四十十年便當續修一次遲之又久故老淪亡書缺有間不特先輩嘉言哲行義夫烈婦與夫文人學士之偉著泯泯無傳即通邑大治大亂而後其事迹亦無從探討余讀而避之此編之存若斷若續因是以覘時局之變遷人材之消長百年来政俗文化之盛衰不可闕也是為序

民國十二年歲次癸亥十月邑人黃恩榮撰錄